

**Ngu jo cjuá xi chja**  
**xujun changá tsëhë Nina VI**

Historias del Antiguo Testamento VI  
Números 26 - Josué



en el mazateco de Chiquihuitán de Juárez.



**Ngu jo cjuá xi chja**  
**xujun changá tséhë Nina VI**

Historias del Antiguo Testamento VI  
Números 26 - Josué



Las ilustraciones son propiedad de la Fundación David C. Cook, usadas con permiso.

Primera edición  
Historias del Antiguo Testamento VI  
en el mazateco de Chiquiluitlán de Juárez  
México, D. F. .6C  
Enero de 1994

## Historias del Antiguo Testamento VI

### Scunihnga Moisés ngu nga censu

(Números 26)

Jinguyējē rē xi siutahacuaha xuta tјē rē Israel ngajan nangui xi hmi rē Moab, tiña ndajyē Jordán jan ne, cachja Nina cojo Moisés cojo Eleasar xi scunihnga me nga ngu censu ta ha camá yachan nu tivatju xi camá censu xi cajnetaha. Nu xi cuacun vēhē ne, xuta xi can nu cojo xi canduvaniji sa ne, camá sacuaha jyun cientu cojo ngu mil cojo yatu cientu cojo catē xuta. Nina cachja me xi censu xi cuma ne, sua chuva hacutjin xticja nangui ngajan ladu rē Canaán xi cjuehe xuta ngajan. Ngu ndihya xuta tјē rē xi hitsē sa cjín me ne, cjuaha me nangui xi hitsē sa jyē, xuta xi hitsē sa chuva me xuta ladu rē me, hacuaha cjuaha me ngu rqui nangui xi hitsē sa chuva. Cahntsua censu vēhē ne, caxinchaain ñihi rē xuta tјē rē Leví, tsēhē xi me xi cuacun vē ne, satiin rē me nangui xi hatuxa cuma tsēhē me. Xuta levita vē ne, xin camaxqui me, hane cama me sacuaha can jyan mil xihin xi ha tјin rē ngu sa cojo xi canduvaniji sa.

Hya xi camá ne, xi cajnetaha catunihnga rë censu vëhë ne, ngajan cavëë Moisés cojo Eleasar xi yëjë xuta xi caviyujutaha xujun xcun censu tjun ne, cahme me. Suva sa Josué cojo Caleb cojo Moisés xi caviyuju me hya. Xuta xi cuacun jan ne, cahme me ngajan ngu xin camaha ni sacuatjin xi ha cachja Nina tsëhë xi camacjaain rë me xi Nina ne, sua rë me yëjë ni nangui ladu rë Canaán.

**Fehya jo ndihya vasen xutacjín cojo Moisés xi sua rë  
me nangui taha ladu vetjucaa tsuhi  
tsëhë ndajyë Jordán**

(Números 32)

Jo ndihya xuta tjë rë Israel, yëjë ni me xi tjë rë Rubén cojo me xi tjë rë Gad ne, jemu cjín chu tjin rë me. Hane cavëë me xi nangui xi tjin taha ladu vetjucaa tsuhi tsëhë ndajyë Jordán ne, jemu ndajyihi xi sinësun chu. Cuatjin camá xi cachja me cojo Moisés xi hitsë sa chuya rë me xi cuiyuju me taha ladu vëhë xi cjuaha me ngu rqui nangui tsëhë Canaán. Ntsacu cavetsihin ne, camacjan rë Moisés

tsëhë xi cuatjin cafehya xuta xi cuacún jan, tsëhë xi tsingatahacacun me xi cuinchachoho xuta xi cuacun jan xuta xi yahnga sa jan, sacuatjin casahmi të xuta xi cavutsejensun jan cahntsua xi yachan nu jan titjun. Peru yëjë cha xihin jan xi tjë rë cha Rubén cojo cha Gad ne, casua cha cjua rë cha xi hya xi cjue yahnga me Canaán, cuiyuju cha xuta rë cha ngu nandya hiscan tjin hnchua casexo rë tahandee rë nandya, hane cjue cha cuisecoo cha xuta xicjin me xi cjue scaan me hisca tsiquehen me yëjë xuta rë Canaán. Ngajan xi Moisés ne, cachja me xi ndatjin, cuma cuiyuju me peru hatuxa meje rë xi sahmichihin me compromisu xi casahmi me. Cuatjin cachja Moisés cojo me. Sehe casua me nangui ladu vetjucaa tsuhi tsëhë ndajyë Jordán jo ndihya xuta tjë rë cha Rubén cojo cha Gad cojo vasen ndihya xi má xuta tjë rë Manasés. (Ndhya xuta tjë rë Manasés, vasen ndihya má, ta xuta tjë rë jima ngu quihndi rë Jacob, má ngu ndihya. Hane ta tsëhë xi Manasés cojo Efraín ne, quihndi rë José hane quihndindai rë Jacob má me, vëhë xi camá xi xuta tjë rë catsijo me vëhë má vasentjin rë ngu ndihya jingu.)

## **Cavitexa Nina xuta tjë rë Israel xi cuatëcja me nangui ngajan Canaán**


**(Números 27:1-11; 34-36)**

Nina cachja me cojo Moisés jani cuechutaha xindyu tsëhë nangui Canaán hacuaha cachja me ta, cuaxë me suerte xi cuatëcja me nangui jan cojo yëjë ni me xi ñaja ndihya xuta cojo vasen ndihya xuta xi cuiyuju taha ladu vetje tsuhi tsëhë ndajyë Jordán jan. Quihndë ne, tsëhë xi Josué cumatitjun me tsëhë yëjë xuta hya xi cuatju cueya Moisés ne, cachja Nina xi me vëhë cojo Eleasar, me xi matitjun tsëhë yëjë ni nahmi ne, jo me vëhë cuatëcja me nangui, hane me xi cuacun vë ne, casua xa me ngu ngu hacuaha casua xa me ngu ngu xihin tsëhë jima ngu ndihya xuta xi cuisecoo me me xi cuacun vëhë.

Hane ngu nga cjuua xi cachja Nina cojo Moisés ne, cachja me xi sa xi ngu xihin sacuiin rë quihndi xihin ne, quihndi rë me xi chjuun jan ne, na vëhë cuma cuiyuju cojo na nangui rë me; hacuaha meje rë xi cjuaha na ngu xihin xi ladu ndihya rë na cojo sa xi nangui rë na ne, ha xuta ladu ndihya vëhë ni cuiyujutsja me.



Xuta Levita ne, satiin rë me ngu rqui nangui ladu vëhë hya xi xticja rë, peru yahnga xuta tjë rë Israel ne, mameje rë xi sua rë me jan tsëhë nangui xi satë rë me yachan jyin nandya xi cuiyuju me jan, hacuaha setahacoo sa nangui xi sinësun chu tahandee rë cahndë xi cuiyuju me jan. Ngajan xi jima ngu ndihya xuta tjë rë Israel ne, meje rë xi sua rë me xuta levita jan ngujo nandya Canaán tsëhë nangui xi ha casatë rë me, hane ngu ndihya xuta xi hitsë sa yehe nangui casatë rë me ne, hacuaha meje rë xi hitsë sa cjín nandya sua rë me xuta levita.



Tsëhë yachan jyin nandya jan ne, jyun cuma sacuaha ngu cahndë xi cuma cuanguen cuinechanhma tsëhë ngu cjuacjintacun. Sacuaha ngu xuta xi hacuiin hatuxa meje catsiquehen me ngu xuta, cuma cjue setaha me ngajan. Hane ngajan ne, tsajin mé cuma rë me ta cuma cuetjutje me tsëhë xuta rë nima xi catsiquehen me jan ta

majin yo cjue tjengui rē me ngajan. Peru sa xi ngu xuta xi hatuxa tjincacun me xi catsiquehen me ngu nga xuta ne meje cjue me jan xi cuetjutje me ne, cumajin cuetjutje me. Ngajan ne, cumacuenda jyê rē me ha tuxa jyihi ni ne, tjin rē me xi cueya me. Vêhê xi cahndê xi cuacun vê ne, suva cuma tsêhê ngu xuta xi hacuiin hatuxa tjincacun me xi catsiquehen me ngu xuta. Hacuaha xuta xi cjue me ngajan ne, tjin rē me xi cuiyujutaha me hisca xi me xi matitjun tsêhê nahmi ne, sahmicuenda me tsêhê xi tsajin jyê rē me. Sehe cuma cjuetju me cjue me tu ya ni ladu xi meje cjue me o cuma cuya me nangui rē me. Peru sá xi cuetju me xi chaja sa cachja nahmi xi tsajin jyê rē me ne, hane sá xi cuechutaha xuta rē nima jan me ne, cuma tsiquehen me xuta vê. Tsajin xi cun rē xuta rē nima ta cavetju me quiji me xi chaja sa cumacuenda tsêhê me. Sacuaha nandya jan ne, Nina ne cachja me xi meje rē xi jyan nandya jan ne, siu taha ladu vetjucaa tsuhi tsêhê ndajyê Jordán, hane jyan nga ne, siu taha ladu vetje tsuhi.

## **Jemu ndaja cjuca cachja Moisés cojo xuta xi camacha ngajan hiscan xin camaha ni tsëhë nandya**

**(Deuteronomio 1-11)**

Xi cavatju yachan nu xi cavetju xuta tjë rë Israel tsëhë nandya Egipto ne, ha tjin chjine me xi hitsë sa ne, cuisehen me ladu rë Canaán. Nangui vëhë ne, ha titjun cachja Nina xi sua rë me xuta xi cuacun vë. Moisés ne, ha vëë me xi cuajin me cuisehen me Canaán cojo xuta xi cuacun jan, ta ha cachja Nina cojo rë me xi chaja sa xi cjuehe me ngajan ne, hisca cueya me. Peru chaja sa xi cueya me ne, meje sua me cumachaya rë xuta tjë rë Israel cjuca xi chja ley xi casua Nina me titjun ngajan ndetjun Sinai jan, tsëhë xi xuta xi siu nixtin hya ne catsin rë me camacha rë me hya xi catsujyihya me ngajan ngu xin camaha ni tsëhë nandya jan, hane tsajin me nixtin titjun.

Cuatjin camá xi casua cuenda Moisés xi Nina cama meje rë me xi xutachanga rë xuta xi cuacun jan ne, cjue cuiyuju me ngajan Canaán. Hacuaha cachja me cojo hacutjin catsingatju me tejo xuta xi quiiji cavutsejensun cahndë vëhë cojo hacutjin xi xutacha rë xuta xi cuacun jan ne, jemu tsacjun me cuisehen me cahndë vëhë.



Hacuaha cachja me xi ngatsë rë vëhë xi casahmi Nina xi catsujyihya me ngajan ngu xin camaha ni tsëhë nandya cahntsua yachan nu, hisca hya xi yëjë ni xuta xi miji cuisehen Canaán jan café me cahme me. Suva tutu sa xuta tsëhë nixtin hya xi siu quicun me quihndë ne, hacui Josué cojo Caleb. Me vëhë siu quicun me ta tsëhë xi jo ni me xi cuacun vë xi cojo me quiiji cavutsejensun me cahndë jan cachja cojo xuta tjë rë Israel xi ndatjin cjue cuiyuju me ngajan Canaán. Hacuaha catsinguitsjen sa rë me xi cacaa rë xutachanga rë xuta xi cuacún jan cojo jo si yehe, ngu ne, xi cafhaxicjin me cojo

xuta amorreo hane ngu nga ne xi cafahaxicjin me cojo xuta basan, hane nangui rë xuta vë xi quitaha taha ladu vetjucaa tsuhi tsëhë ndajyë Jordán jan ne, ha tsëhë ngu ndihya xuta tjë rë cha Rubén cojo cha Gad cojo vasen ndihya xi má tsëhë xuta tjë rë Manasés. Hacuaha cachja sa Moisés cojo xuta jan xi cachja Nina cojo rë me xi cuajin me cuisehen me Canaán cojo xuta xi cuacun jan, hane xi cuatju cueya Moisés ne, Josué cuma titjun me tsëhë xuta jan.

Moisés ne, hacuaha cachja me cojo yëjë xuta tjë rë Israel jan xi jemu vengui chji rë xi cjuenduju sa xuta jan cuetaharcu me ley rë Nina hya xi cuiyuju cahndë me ngajan Canaán. Hacuaha cachja me xi jemu vengui chji rë xi cuicuya xuta quihndi rë me o sa quihndindai rë me ley rë Nina. Hacuaha catsinguitsjen sa rë me xi hacuaha sahmi nguujyë xi hacuiin cjuaharcun me nina ndyojo o sa nina ndacha; ta nixtin xi cachja Nina cojo xutacha rë xuta jan, nixtin xi casua rë me Nina të mandamientu rë me, hya camachaya rë me xi tsajin me machjirëhë ngu nina ndyojo. Vëhë xi cumajin cjuaharcun me nina xujun o sa nina ndyojo o sa tsuhi o sa xi sá o sa xi niñu. Moisés ne, hacuaha cachja me cojo xuta jan xi sa xi cjuaharcun me nina ndacha ne, sahmi Nina castigu me hacuaha cuaxë me me tsëhë

Canaán cojo sa xi cuatjin ne, cuma meje nga cjuaharcun me Nina xi cjuaquixi.

Hacuaha catsinguitjen sa me xuta jan xi jemu cjín cjuarcun casahmi Nina ngatsë rë xutacha rë me. Me vëhë cojo xutacha rë me xi cachja Nina cojo rë me. Hane cojo tyjavañuju rë me cahndë me cjuar rë Nina. Hacuaha cachja Nina xi tsajin yo sa xuta xi cavaxë rë me tsëhë cjuañihi xi hinchä me sacuatjin cavaxëtje Nina me. Ngajan xi Moisés ne, casuacuenda me xuta tjë rë Israel jan xi compromisu xi casahmi Nina cojo xutacha rë me ne, vengui sa chji rë xi cuma rë xuta xi siu quihndë, ta compromisu xi casahmi Nina cojo yëjë ngu nación xuta tjë rë Israel ne, tsajin nu tsajin nixtin xi cuijnetaha.

Hacuaha cavuya cachjasun nga Moisés të mandamientu xi casua Nina xuta tjë rë Israel ngajan ndetjun Sinaí. Hacuaha catsinguitsjen sa rë me yëjë sa ley xi casua Nina me. Hacuaha cachja cojo me tsëhë xi jemu cjín ndiya cahndiin me tsëhë Nina hisca nixtin xi cavetju me tsëhë Egipto. Hacuaha cachja me cojo xuta jan xi hacuiin cuatjin sahmi me, hacuaha hacuiin choho tsingatahacacun me cojo sa xi scuëë me xi mé xcusun cuya sahmi Nina. Hacuaha

casuacuenda Moisés me xi cahntsua yachan nu xi cavatju jan ne, cojo cjuañihi xi cavatju me hya, cafabachuva Nina me cojo sa xi cumatsejen ¿há xi cuetaharcu me cjua rë Nina?, o ¿há xi cuetaharcuaain me? Hacuaha cachja me cojo xuta xi cuacun jan xi casua Nina cahndë xi xutachanga rë me ne, jemu cuma jindya rë me, peru hya xi camá ne, catsingatju me mana xi sinë me xi cuacun jan cojo sa xi cuatjin casacu camachaya rë xuta jan xi hacuïin suva ni xi xinë sahmi xi cuma cuinechan cjuahñu ta hacuaha meje rë xi cuinuhyaan cjua rë Nina.



Hacuaha cachja sa Moisés cojo rë me cjua vihi:

—Tinuhyun ngayujun ni xuta tjë rë Israel: Yahvé ne, me vëhë xi Nina naja me. Ngu tutu ni me vëhë xi cjuaquixi xi Nina me. Meje rë xi nihña hmutacun me cojo yëjë ni ngahñu naja. Meje rë xi ninguitsjen cjua rë ley rë me yëjë ni hora yëjë ni nixtin. Meje rë xi cuicuyan rë quihndi naja hacuaha cuinújan cojo rë yëjë hora yëjë nixtin. Cuinújan cojo tu jani ni xi nechantahan. Hacuaha meje rë xi nihindun cjua rë sehe chjahan cuinchaan ndaja cahntsua ngu caxa lihndi, sehe cuetahan caxa jan ntsaan cojo sa xten. Hacuaha meje rë xi nihindun ngu jo cjua rë ley jan tingotjo ndyanaja cojo ya ngahñu rë. —Cuatjin cachja Moisés.



Quijinduju sa cachja me cojo rë me xi hya xi cjue cuiyuju cahndë me ngajan Canaán ne, meje rë xi tsiquehen me yëjë xuta xi siu jan, tsëhë xi jemu choho camaha ni xcusun rë xuta xi siu jan. Hacuaha casacuiin rë me cahndë xi sahmi me



compromisu cojo xuta xi cuacun jan xi cuixan me cojo rë me, ta sa xi tsingatihin me sahmi me xcusun vëhë ne, cuatjin cumá cuincha haxi me xi cuacun jan me xi cjuaharcun me nina ndacha rë me. Hacuaha cachja sa me cojo xuta jan xi tsinguetsun me yëjë ngasunscun rë xuta xi cuacun jan, hacuaha tsinguetsun me nina rë me xi tu cahvi ni rë cojo yëjë sa xcusun xi sahmi cojo xuta jan sacuatjin xcusun rë yungun rë xuta Canaán jan, cojo sa xi hacuiin cjuahachuva me me xi cuacun jan hane cojo me sahmi me sacuatjin sahmi xuta xi cuacun jan; ta xi meje rë ne, suva ni Yahvé cjuaharcun me, me xi Nina xi cjuaquixi.

Hacuaha catsinguitsjen sa Moisés xuta tjë rë Israel jan xi hacuiin cavaxijin Nina xutachanga rë me tsëhë xi jemu ndaja casahmi me ta, cavaxijin Nina me tsëhë xi hmucacun Nina me. Hacuaha cuatjin casahmichihin me compromisu xi casahmi me cojo xutachanga rë me: nima Abraham, cojo Isaac, hane cojo Jacob. Hacuaha catsinguitsjen sa rë me xuta tjë rë Israel jan xi hacuiin tsichaya me Nina hya xi ha ndaja siu me ngajan Canaán cojo yëjë xcusun xi sacu rë me. Hacuaha cavetahacoo sa Moisés cachja me xi casua Nina xuta tjë rë Israel nangui Canaán ta tsëhë xi xuta xi siu jan ne, jemu

tsehen me. Hacuian casua me tsëhë xi hatuxa satë rë me. Hacuaha catsinguitsjen rë me xi cojo cjua ngarca rë me ne, ngajan cjui ngajan nduva macjain rë me tsëhë Nina nixtin hya xi catsujyihya me ngu xin camahani jan. —Cuatjin cachja me. Sehe cachja sa me cuitjin:

Yahvé, Nina naja ne, cachja me cojo naja ngu jo ni cjua xi meje rë me xi nihña. Chja me xi meje rë me xi chjahanrcun me, hacuaha hacutjin xcusun xi vicuya ni naja me ne, vëhë xi meje rë me xi nihña: nihña hmutacuun me cojo yëjë xahasen naja, nihña hacutjin xi meje rë me ne, hacuaha cuetahanrcun cjua xi chja ley rë me. Ngayun ne, ninguitsjun ley vihi ta ha tsujun ndaja. ¡Ningatuhuntacun! Nina xi casahmi me ngahnga ne, me vëhë cavaxijin nuju me cojo xutachanga nuju cojo sa xi ngayun cuma xuta ladu rë me ngayun. —Cuatjin cachja me.

Hya xi camá ne, Moisés casua me camachaya rë xuta xi sá xi cuetaharcu me yëjë ley rë Nina ne, Nina ne, cuaxë me xuta cananeo hane sua me jingujyë ni ladu tsëhë nangui Canaán. Hacuaha ndaja tsingatju me tsi ngajan cojo sa xi ndaja cuma xitjë rë me.

## **Tsinguitsjen Moisés xuta tjë rë Israel yëjë ley rë Nina**

**(Deuteronomio 12-26)**

Catsinguitjen Moisés xuta tjë rë Israel yëjë ley rë Nina, cojo hacutjin xi hatuxa tjin rë me xi cuetaharcu me cjuarë. Jemu cjin ndiya casua me camachaya rë xuta cjuarë yëjë ley xi casua Nina me ngajan Naxi Sinaí jan, hacuaha cojo sa ngu jo ley xatsë xi casua Nina me ne, casua me cjuarë camachaya rë xuta jan. Hacuaha cachja me cojo rë me, mé xi meje rë xi sahmi me sá xi cuechu ngu nixtin xi cumameje rë me ngu me xi cumatitjun camaha ni tséhë me xi sahmi rë me gobiernu sacuatjin tjin me xi casahmi rë me gobiernu jingu sa ladu jan. Cachja me xi me xi cumatitjun tséhë me ne, meje rë xi cuaxijin me me tséhë ngajni rë xuta tjë rë Israel , hacuian xutaxin má me. Hacuaha me vëhë ne, miji rë xi jemu cjin naxin tjin rë me, hacuaha miji rë xi jemu cjin chjuun rë me, hacuaha miji rë xi jemu cjin tujún sahmitangun me; hacuaha hisca ngu xi cumatitjun ne, miji rë xi cuya tsingatju me xuta tjë rë Israel ngajan Egipto. Hacuaha meje rë xi cuejñatsja me ley rë Nina hane nchunchujunni scutaya me ley jan.


Hacuaha cachja me tsëhë ngu xuta xi cuichja me xi profeta me. Cachja me xi meje rë xi ndaja cjuahacuenda me cjua rë ngu xuta jan ¿há cuetjucaa cjua jan? ¿há cuetjucaain? Meje rë xi ndaja cuahacuenda me cjua rë me ta cjua rë me jan ne, tsingacun sá xi profeta jain me, o sá xi hacuiin profeta me. Hane xi cuatjin ne, sacu cumachaya rë me sa hacui jain ngu profeta xi catsingatju Nina ngajñi rë me, o sá xi ngu xuta xi tu tsindajaya ni me cjua xi chja me. Nina sahmi me castigu hisca cueya ngu me xi tu cuindacha me xi cuichja me xi Nina catsingatju rë o xi chja me xi catsingatju rë me jingu sa nina. Hacuaha cachja me cojo rë me xi cjuin me ndava ngu xuta xi sahmi adivinar me sacuaha sahmi xuta jingu sa cahndë ta, Nina ne, chuyiin rë me tsëhë xcusun vëhë.

Hacuaha cachja me cojo xuta jan xi sá xi ngu xuta cuma me castigu tsëhë xi ngu xuta catsiquehen me ne, meje rë xi tjin jo xuta xi tsinguixi jyê rë me.

Hacuaha cachja sa Moisés cjua xi cuijyihí cojo xuta jan:

Sá xi cuityangui me ngu xuta tsëhë xi ngu xuta catsiquehen me ne, meje rë xi tsitujne me nima jan ne, cojo sa xi ha nixtin hya ni

cueyaniji me. Nina ne, ha cafaacuenda me xi jyê vëhë jemu choho xcusun vëhë, hane vëhë xi caxtyangui xuta jan.



Sá xi ngu xuta sacu rë me ngu ndava nisë xi hinchá chjoo o sá xi quihndi ne, cuma cjucojo me chjoo o sá xi quihndi jan; peru chu naa jan ne, meje rë xi sua me cahndë cju chu.

Sacuaha ngu xuta amonita cojo xuta moabita ne, cumajin cuindeya me ladu rë me xi cuma me sacuaha xi ha xuta tjë rë Israel má me, tsëhë xi xuta xi cuacun vë ne, cavechji rë me Balaam xi choho cuichja me tsëhë xuta tjë rë Israel.

Sá xi cuatju ngu xuta ngu cahndë xi tjin tjë uva ne, cuma cuajne me uva xi sinë me ngajan ni, hacuiin ngu cjuachëjë vë; peru cumajin cuajne me uva cojo sa xi sinë me ngascan. Ha cuanitjin ni cuma sá xi cuatju me ngu cahndë hiscan tjin tjë trigu o sa jingu sa xitjë.

Sá xi ngu xihin chuyiin rē cha tsēhē chjuun rē cha tsēhē xi casahmi na ngu xcusun xi ndajintjin, hacuaha cuaxē cha na tsēhē ndava cha ne, meje rē xi tsihindu cha ngu xujun xi sua cha na, hiscan xi cuichja xi nixtin hya ni ne, ha casmi xicjin camaha ni me.

Hisca xi ngu xuta ne, cumajin cumá me castigu sá xi nahmi rē me o sá xi quihndi rē me choho casahmi. Tsēhē cjuachoho xi casahmi suva cha ne, vēhē xi cuma cha castigu.

Sá xi sehen rē ngu xuta xi choho casahmi me ne, yachan ndiya ni xi cuma sehen rē me, peru cumajin xi cuatjutaha sa.

Miji rē xi nihñu ndetjun chu ndyaja hora xi tisune chu tjē, meje rē xi tuhun hitsē cahndē sinē chu sá xi vojo rē chu.

Sá xi ngu xihin cueya hane cuejña cahan chjuun rē cha, sá xi hacuaha tsajin rē na jan quihndi ne, ngajan meje rē xi ngu hntsē nima jan ne, cuixan cha cojo rē na, hane xi sacu rē na quihndi ne, quihndi xi tjun tjun sacu rē ne ne, vēhē cuma sacuaha quihndi rē nima jan. Xi cuatjin sahmi me ne, hacuaha sacu ngu quihndi xi cuiyujutsja nangui rē nima.

## **Ngu jo conseju xi cajnetaha casua Moisés**

### **xuta tjë rë Israel**

**(Deuteronomio 27-30)**

Hya xi meje cuijnetaha casua Moisés conseju xuta jan ne, cuitjin cachja me:

—Tuhunchinu yojo nuju xi cuetuhuncun yëjë ley rë Nina ta, xuta xi cuetaharcuaain me yëjë ley vëhë ne, jemu chja cuatju me xi sahmi Nina me castigu. Hane nixtin xi cuatjuncjun ndajyë Jordán jan ne, meje rë xi tinchun ngu jo ndyojo yehe ngajan ndetjun Ebal, ndandaja nixtun xcun ndyojo jan cojo mescla sehe nihindun xcun ndyojo jan cjuarë ley rë Nina jan. Hya xi cama ne, nindujun ngu ngasuncun ngajan sehe nicuhun chu xi tuhun rë Nina sacuaaha cjuatjo xi tjinchihin cojo cjuatjo xi xinu tsë tsë. Hacuaha nihñu ngu suhi cojo cjuasua.



Cavuya cachja nga Moisés cojo rē me tsēhē yējē cjuandaja xi sahmi Nina cojo rē me, sá xi cuiyujutaharcu me yējē cjua rē ley vēhē, hacuaha cachja me hacutjin xi choho sahmi Nina cojo rē me sá xi cuetaharcuaain me. Sá xi cuetaharcu me cjua rē ley vēhē ne, Nina sahmi me xi jemu ndaja camaha ni cuma xitjē xcun nangui rē me hane jemu cjín chu sacu rē me. Hacuaha jercu cjín camaha ni cuma xuta tjē rē me; hacuaha me xi cuacun vēhē scaa rē me cojo si xi sahmi me cojo condra rē me. Peru sá xi cuetaharcuaain me cjua rē ley vēhē ne, Nina sahmi me xi jemu jyē cjuañihi cuatju me xi cuma hmu rē me, xiya nandá, hacuaha cjuehe chíhin xi yaha natsē hacuaha cuma jindya rē me. Hacuaha Nina sahmi me xi scaain rē me cojo si xi sahmi me cojo condra rē me, hacuaha sua Nina cahndē xi condra rē me jan ne, jemu cjín camaha ni cjuecojo rē me tsēhē Canaán, hacuaha tsingatju nguehe tsingatju ngajan me me yējē ni ladu hiscan xi cumajin cuiyuju me cojo ngu cjuandaja cjuajeya ngatsē rē xi cuetaharcuaain me cjua rē Nina.

Sehe ngajan xi Moisés ne, cachja me cojo xuta cjua vi: ¿há tsingatihin me sahmicihin me cojo Nina compromisu xi casahmi xutacha rē me cojo Nina? Hacuaha cachja me cojo rē me xi ley rē



Nina ne, hacuiin chja camaha xi cuetahanrcun cjua rë, sacuahha ley xi ha siutsja me. Ha vëë xu me cjua xi chja ley rë Nina hacuahha ha vëë xu me xi hacuiin jemu chja xi nihña sacuatjin xi chja ley jan.

Hacuaha cavinenguise Moisés me ta, ¿jarë xcusun xi chuya rë me?; ¿há xi nihña cjuandaja cojo sa xi cuinechan cjuahñu? o sa tsajin ne, ¿há xi nihña cjuatsehen cojo sa xi cueyan? Peru xi má xu rë Moisés ne, hitsë sa ndaja xi naxejen xcusun xi cuinechan cjuahñu. Vëhë xi meje rë xi tsihmucacun me hacuahha cuetaharcu me cjua rë Nina.

Hacuaha cavuya cachja nga me cojo rë xuta jan xi sá xi cuetaharcuaain me cjua rë Nina hane cjuaharcun me nina ndacha ne, suva mé xi ndajintjin tsingatju Nina xi cuma rë me. Cuatjin sahmi Nina cojo sa yëjë ni xuta ngarca cumachaya rë me xi xuta tjë rë Israel cojo nangui rë me ne, jemu tivatju me cjuañihi tsëhë xi casahmichiin me compromisu xi casahmi me cojo Nina. Peru sá xi cuya cjuaharcuun me ngu tutu Nina jain hane cuetaharcu me cjua xi chja ley rë Nina ne, sehe jemu ndaja sahmi Nina cojo me, cuya cjuecojo nga me ngajan Canaán, hacuahha sahmi me xi jemu ndaja cuatju me.

## **Josué camatitjun me tsëhë xuta tjë rë Israel**

### **tsëhë xi cahme Moisés**

**(Números 27:12-23; Deuteronomio 31-34)**

Xi catsinguijnetaha cachja Moisés ngu jo sa cjuua xi vinchangui me xuta tjë rë Israel jan ne, sehe cachja me cojo xuta jan xi ha ngu cientu cojo can nu tjin rë me, hacuaha jemu camatiña nixtin xi cueya me. Vëhë xi Josué cuejña me cahndë rë Moisés, hane me vëhë cjue me cojo rë xuta jan ngajan Canaán. Hacuaha cachja nga me cojo Josué cojo xuta jan xi meje rë xi catiyujuhñu me cjuatacun rë me.

Moisés ne, catsihindu me yëjë ni cjuua rë ley rë Nina jan, sehe catsijeyu me, hane casuaxa me xuta levita cojo yëjë xutachanga xi sua cjuua cojo xuta tjë rë Israel jan. Hacuaha cachja me cojo rë me xi scutaya me xujun jan chuva yatu nu hya xi chjahajeya rë nixtin rë suhi xi má tsëhë ndihya xca. Hya ne cuma tangun yëjë xuta tjë rë Israel hane scutaya me cuichjasun me cjuua rë xujun jan xi cuihndë xuta tjë rë Israel, sá chjuun sá xihin me, sá xuta changá me sá nixti me.

Hya xi camá ne, sehe xi cachja Nina cojo Moisés xi meje  
 cuechutaha nixtin xi cueya me ne, cachja sa me xi squindaya Moisés  
 Josué hane sehe cjue tangun me ndava Nina. Hane Moisés ne,  
 cuatjin casahmi me. Sehe ngajan xi Nina ne, cafehe me yungun jan  
 ngajñi rë ngu yufi. Sehe cachja Nina cojo Josué xi meje rë xi



catejñahñu me xahasen  
 rë me hacuaha tsacjuin  
 me cumá ta Nina ne,  
 hatuxa tacun me cojo rë  
 me xi cuisecoo rë me xi  
 hacuaha cjue me cojo  
 yějě xuta tjě rë Israel  
 ngajan Canaán. Moisés  
 ne, cachja Nina cojo rë  
 me xi cuisanetsja me rcu  
 Josué xcun yějě xuta tjě  
 rë Israel, hane xi cuatjin  
 sahmi me ne, vëhë tsejen  
 xi xa xi tjun cafaha  
 Moisés ne, cama cafaha

Josué. Hane cuatjin casahmi Moisés.

Hya xi camá ne, Moisés cojo Josué jan ne, casë me ngu cantu tsëhë xuta tjë rë Israel jan. Cantu jan ne, chja tsëhë hacutjin jyë hnga Nina cojo cjuatacun rë me, hacuaha chja cantu cojo rë xuta xi cuacun jan ta hacuiin sahmi taja me rcu me cojo sa xi cuetaharcuaain me cjuu xi chja Nina.

Xi cajnetaha Moisés cjuu cojo xuta ne, catsinchacun me jima ngu ndihya xuta tjë rë Israel. Sehe quijiniji suva me ndetjun Nebo hiscan matsejen nangui Canaán. Hya xi cafehe me ngajan ne, ngajan cahme me. Peru tsajin yo vëë jani cavejña tsjun rë nima. Moisés ne, ngu profeta xi hitsë sa hñu cjuu rë me xi cuma cjuu rë yahnga profeta.

Hya xi cama ne, yëjë ni xuta tjë rë Israel caviyuju me xun tsëhë nima Moisés. Sehe hya xi cajnetaha nixtin rë cjuava jan ne, Josué ne, cafaha me xa rë Moisés, camá titjun me. Hane jemu casua Nina me cjuatacun.

## **Vatjucja xuta tjë rë Israel ndajyë Jordán cjuj me sacuatjin tichja Josué**

**(Josué 1-5)**



Hya xi cavatju cahme Moisés ne, cachja Nina cojo Josué xi tsingatju Josué yëjë xuta tjë rë Israel ngunda vëhë tsëhë ndajyë Jordán, ladu tsëhë Canaán, hisca xi ha cachja Nina cojo xutachanga rë me xi sua me. Hacuaha cavuya casua Nina cjua rë me cojo xuta xi cuacun vë xi scaa rë me cojo yëjë si xi sahmi me jan cojo sa xi cuma cjuaha me nangui ladu vëhë cuma tsëhë me.

Vëhë xi cachja Josué cojo xuta jan xi yëjë ni hora ne, catitsinguitsjen me cjua rë ley rë Nina, hane cuetaharcu me cjua jan, hane tsajin nixtin tsichaya me. Xi cuatjin sahmichihin me cjua rë me, hacuaha Nina, cuisecoo rë me. Xi cajnetaha cjua jan ne, sehe cavitexa Josué yëjë xuta xi catëhëchjine me yojo rë me ta cuatjucjin me ndajyë Jordán. Catsinguitsjen rë me xuta tjë rë jo ndihya vasen xi ha


cafhatsja me nangui taha ladu vetjucaa tsuhi tsëhë ndajyë Jordán xi ha casua me cjua rë me xi cjue cuisecoo me xuta tjë rë Israel xi cjuahaxicjin me cojo xuta Canaán.



Hya xi camá ne, sehe catsingatju me jo xihin xi quiji cavutsejensun nangui Canaán. Hane jo xihin jan ne, quiji me nandya Jericó cavechu me ndava ngu na viteña yojo rë na xi hmi rë

Rahab, hane ngajan caviyujuhma me nguixun. Peru me xi matitjun tséhě nandya Jericó jan ne, camachaya rě me xi ngu jo xuta tjě rě Israel xi cafehe cavutsejesun me nandya ne, siu me ndava na Rahab. Hane catsingatju me ngu jo xuta xi sahmi xa rě me xi cuichja me cojo ran xi sahmi na entregadu xuta jan. Peru na Rahab ne, cojo tjun sa camachaya rě na xi cjue cuinchise rě xuta jan. Hane cavinchahma na xuta jan ngajñi ngu xcusun sacuaha tsánga xi viyujusun rcu ndihya tséhě ndava na. Hane xi cafehe xuta xi catsingatju me xi matitjun jan cavinenguisse me me xi cavutsejensun jan ne, cachja na ta tsajin xti me ta ha cafe me tséhě nandya vėhě. Ngajan xi me xi cuacun jan ne, ngutjen ni quiijtjengui me xuta xi vutsejensun jan.

Hya xi cavetju xuta jan ne, na Rahab ne, quijiniji na quiijtjengui na xuta xi vutsejensun jan ngajan hiscan xi caxinchahma me. Sehe cachja na ta vėě na xi Nina sua me xuta tjě rě Israel yějě nangui Canaán. Hane ngatsě rě cjua vėhě ne, cafehya na favor xi cuisecoo me na sacuanitjin cavisecoo na me ta tsiquiin me na cojo xuta rě na hya xi cjuahaxicjin me cojo yahnga xuta Jericó. Hane me xi quiji cavutsejensun jan ne, johu cachja me. Ndava na Rahab jan ne, rcu xihndě hnhua xi vechja rě tahandee nandya jan ne, ngajan tacun



ndava na. Cuatjin camá xi cama cafaha na  
 ngu nahñutaja jyë ne, sehe catsitujne na  
 xuta xi vutsejensun jan taha ventana xi  
 tacun taha ngaxtun ciuda jan. Peru cachja  
 na cojo rë me xi cuiyujhuma me jyan nixtin  
 taha ngaxtun ndetjun xi siu hane sehe cuma  
 cjuetjengui me xuta ladu rë me. Hane me  
 xi cuacun jan ne, cachja me cojo rë na xi  
 tsihñu na ngu nachjun hani ventana vëhë,  
 sehe catisahmi tangun na yëjë xuta rë na



ngajan ndava na, cojo sa xi xuta tjë rë Israel ne, scuëë me jarë xi ndava na, hane tsiquiin me xuta xi siu cahntsua ndihya vëhë. Hane na Rahab ne, joho cachja na hane casahmi na cuatjin. Sehe cafe xuta xi cuacun jan.

Hane xi cafë jyan nixtin hinchahma xuta xi quiji cavutsejensun jan ngajan ne, sehe cavuya me cafe me hiscan tacun Josué cojo yëjë sa xuta tjë rë Israel. Hane xi cafehe me jan ne, sehe cavetsihin casuacuenda me hacutjin casahmi Nina xi yëjë ni xuta Canaán ne, tsacjun jain me xuta tjë rë Israel.

Sehe ngajan xi Nina ne, cavitexa me Josué xi cuitexa me nahmi xi cjue me ndaya ndajyë Jordán cojo caxa ximinchacun. Hane Josué ne, cuatjin casahmi me. Hane xi tu casatë ntsacu nahmi jan ndajyë ne, cama jo cahndë ndajyë jan. Hane nandá xi nduvajne sa ne, ha ngu cahndë caviyujundu ni. Cuatjin caviyujundu handasa xi nu hya ne, hya jemu mayehe ndajyë. Hane nahmi xi yaha caxi ximinchacun jan ne, vasencjan xanga ndajyë jan caxinchacunhñu me hisca xi cafë yëjë xuta cavatjucja me ngajan. Hane catsingatju Josué tejo xihin, ngu ngu me tsëhë jima ngu ndihya xuta cojo sa xi ngu ngu me ne,

cjue me hiscan caxinchacunhñu nahmi jan sehe cjuaha me ngu ngu ndyojo yehe tsëhë xanga ndajyë. Sehe cjuecojo me ngajan ngunda cuiyujundu me hiscan xi tsindaja me ndihya tsjian rë me. Cachja Josué xi cuatjin cjuaha me ndyojo cojo sa xi tsinguitsjen me cjuarcun xi casahmi Nina ngatsë rë me nixtin hya. Xi tu cafë xuta cavatju me xanga ndajyë ne, ngajan xi nahmi xi yaha caxa ximinchacun jan ne, hacuaha cavatjucja me ndajyë hisca taha ladu vetje tsuhi. Hane hya xi cama cavatju me ne, cavuya nga ndajyë jan caseya cahndë rë.




Xuta xi catsin cahntsua yachan nu xi catsujyihya xuta tjë rë Israel ngajan ngu xin camaha ni ne, cjëë xti chuxin rë sacuatjin cachja Nina cojo Abraham. Cachja Nina xi nixti langa xi xihin ne, xi cjuë jyin nixtin xi catsin ne, xti chuxin rë. Cuatjin camá xi hya xi ha cafë xuta tjë rë Israel cavatjucja me ndajyë Jordán jan ne, cavitexa Nina Josué xi cuatë me chuxin rë yëjë ni xuta xi xihin. Hacuaha hya ne, cavechu sá xi tjun tjun tsëhë nu, hane yëjë xuta tjë rë Israel ne, casahmi me suhi tsëhë Pascua nixtin teñuju tsëhë sa. Trigu xi camá ngajan Canaán ne, vëhë catsicojoxa me xi casahmi me niñu rë me. Casahmi me niñu xi tsajin san rë hane cajnë me niñu jan cahntsua ngu totje xi cavatju suhi pascua jan. Nixtin hya ne, cavixiin sa mana, ta tjin xitjë xi sinë me.


## **Cacaain rē xuta Jericó cafaħaxicjin me cojo xuta tjē rē Israel**

(Josué 6)

Yējē xuta Jericó ne, jemu tsacjun me xuta tjē rē Israel. Yējē ni me xi siu cahntsua hñhua rē ciuda jan ne, hisca ngu me vetjiin visehen me, hane tingotjo rē hñhua, xi jiyandee rē ciuda jan ne, ndaja tichjahñu. Sehe ngajan xi Nina ne, casuacuenda me Josué mé xi meje rē xi sahmi me cojo sa xi cuma cuaxētje me yojo rē me tsēhē si cojo xuta Jericó. Cuitjin cachja Nina cojo Josué:

—Tinújun cojo sindadu nuju cojo ngu jo nahmi xi catahaniji me caxa ximinchacun naha catitsujyihya me cojo jingundee ni ciuda Jericó ngu ngu ndiya xi ngu nixtin cahntsua jyun nixtin. Peru hora xi tsujyihya me ne, hisca xi ngu me ne, tsajin mé ngu cjua xi cuichja me jinguyējē rē xi tsujyihyandee rē me ciuda jan. Hane xi má yatu nixtin jan ne, cuitijñundee rē yatu ndiya. Hane xi cuijnetaha xi yatu ndiya jan ne, nahmi jan ne, tsijane me tyjo rē me xi ninda ndyaja rē chu tsánga camá. Hane xi cuihndē cha sindadu xi





fane tyjo jan ne, squindaya yějě ni cha cuichjahñu cha, hane cuixujne hnchua casexo rě tsěhě Jericó. Cuatjin sahme castigu yějě ni me xi siu cahntsua ciuda vėhě. Nicuhun yějě ni xuta cojo yějě ni chu xi siu. Hane yějě ni xcusun xi quicha camá ne, nduvuncujun tiyujun ngajan yungun naha, sehe tacun yějě ciuda vėhě. Tsajin camaha ni mé xi chjuhun xcusun xi siu ngajan Jericó.

Josué ne, cachja me cojo xuta jan sacuatjin cachja Nina cojo rě me, hacuaha cachja me xi tsajin camaha ni yo xi cuejña quicun ngajan Jericó, suva ni na Rahab cojo xuta rě na, ta tsěhě xi na vėhě cavisecoo na xuta xi quiqi cavutsejensun jan. Xuta Israel jan ne, casahmi me sacuatjin cachja Nina. Catsujyihya me jingundee ni Jericó ngu ndiya xi ngu nixtin cahntsua xi jyun nixtin. Hane ngu nixtin xi má yatu nixtin jan ne, yatu ndiya catsujyihindee rě me. Hya xi camá ne, sehe catsijane nahmi tyjo rě me, hane sindadu jan ne, cajindaya cha cachjahñu cha. Hane hnchua jan ne, cavixujne. Hya xi camá ne, ngutjen ni cavisehen yějě ni cha sindadu rě xuta tjě rě Israel catsiquehen cha yějě ni xuta hacuaha catsiquehen cha yějě chu xi siu. Sehe cavetaha rě xuta ndihi nandya Jericó. Peru sacuaha

na Rahab cojo yějē xuta rē na ne, cavaxē me na quijicojo me na hiscan siu ndihya tsjian rē xuta tjē rē Israel.

## **Tsingatahacacun xuta tjē rē Israel xi tsiquehen me yějē xuta nandya Hai**

(Josué 7-8)

Ngu xuta tjē rē Israel jan ne, miji cuihdē me cjua sacuatjin cavitexa Nina xi ndastu mé cjuaha me tséhē xi sacu rē me ngajan Jericó. Hane cha vėhē, cha xi hmi rē Acán ne, cavėē cha ngu rqui



oro cojo ngu jo tujún ndaja cojo ngu chingá xcun xi jemu tsjian ndaja camaha ni. Hane jercu camameje cjuaha cha xcusun vëhë. Cuatjin camá xi quiji cojo cha hane cavinchaniji cha nguihma ndava cha, hane tsajin yo cavëë xi cafaha cha.

Xi camá ngascan jan ne, sindadu rë xuta tjë rë Israel ne, quiji cafaha xicjin cha cojo xuta tsëhë ngu nandya xi hmi rë Hai. Hane tsëhë xi hacuiin jyë camaha nandya vë, catsingatjiin me yëjë sindadu. Peru xi cavetsihin cafaha xicjin me cojo xuta nandya Hai jan ne, xuta xi cuacun jan ne, jercu casahmi me ngahñu, hane cacaa rë me cojo sindadu rë xuta tjë rë Israel. Hya xi camá ne, xuta tjë rë Israel ne, jemu camachuvacacun me, hane Josué ne, casahmi me oración rë me cojo Nina ngatsë rë xcusun vëhë. Ngajan xi Nina ne, cachja me cojo Josué xi catsichaja xuta tjë rë Israel xcun si vëhë ngatsë rë xi tjin ngu cha xi cavetaharcuaain cha cjuua xi cavitexa Nina ta cachja Nina xi cjuuaain me hisca xi ngu xcusun xi sacu rë me tsëhë xuta ngajan Jericó. Cuatjin cachja Nina.

Sehe ngu tajñu xi cama nchujun jan ne, cavaxë xuta jan suerte hane cafehya rë me Nina favor xi ngajñi rë suerte tsingacun me yo



xi quitjen jyê vëhë. Hane Nina ne, tjun casahmi me xi casatë rë ngu ndihya xuta tjë rë Judá. Sehe casatë rë ngu ndihya xi xuta ladu rë me xi cuacun vëhë má me, hisca xi cajnetaha xi casatë rë cha Acán. Ngajan xi Josué ne, cavinenguisse rë me cha Acán, ¿há hacui cha cafaha cha? Hane cavijacun cha xi hacui cha cafaha cha. Ngajan xi xuta tjë rë Israel jan ne, quiji cojo me cha ngajan ngu xin camaha ni tsëhë ndihya tsjian rë me. Hacuaha quijicojo me yëjë xi tsëhë cha cojo xcusun xi cafaha cha jan. Hya xi camá ne, sehe catsiquehen me cha cojo ndyojo.

Hya xi camá ne, cachja Nina cojo xuta xi xi cjuaha xicjin me cojo xuta nandya Hai ne, catatëcja me sindadu rë me jo cahndë, hane cuatjin casahmi cha. Sehe ngu cahndë sindadu rë me ne, tu cavindacha ni cha ta casahmi cha sacuaha xi cuanga cha. Hane xuta ladu rë nandya Hai ne, quiji cavangacojo me cha. Hya xi camá ne, ngu cahndë sa cha xi hinchahma cuaha tiña nandya Hai ne, cavetju cha tsëhë hiscan xi hinchahma cha. Sehe quiji cavisehen cha nandya Hai cavetaha rë cha ndihi nandya. Hane hora vëhë ne, cha sindadu rë xuta tjë rë Israel xi cavindacha cha xuta nandya jan xi casahmi cha sacuaha xi tivanga cha ne, cavuya cha quiji cha hiscan nduva



xuta ladu rë nandya Hai jan hane ngajan catsiquehen cha yëjë me.  
 Hya ne, cachja Nina cojo xuta ladu rë xuta tjë rë Israel jan xi cuma  
 cjuaha me chu cuma cjuaha me yëjë xcusun xi cafahataha me tsëhë  
 xuta nandya Hai jan.

Hya xi cavatju yëjë xcusun vëhë ne, catsindaja Josué ngu  
 ngasunscun tsëhë suva ndyojo ngajan hiscan ndetjun Ebal. Hane

xuta tjë rë Israel ne, ngajan catsiquehen me chu sacuaha ngu cjuatjo tjinchihin xi casua rë me Nina cojo ngu cjuatjo xi cajinë tangun me. Hacuaha ngajan catsihindu Josué cjua rë ley xi casua Nina nima Moisés hya xi cavejña me cjuahñu. Sehe cavutayahñu me cjua jan xi cuihndë yějë xuta tjë rë Israel. Cavutaya me hiscan xi chja hacutjin xi sahmi Nina xi jemu ndaja cuatju xuta sá xi cuihndë me ley rë Nina. Hacuaha cachja me xi choho cuatju me cuma sá xi cuijñircuaain me cjua rë ley jan. Cuatjin cavutaya Josué ta tsëhë xi cuatjin cavitexa nima Moisés cojo rë me hya xi chaja sa cueya.

## **Cavindacha xuta nandya Gabaón xuta tjë rë Israel**

(Josué 9)

Nandya xi tacun taha ladu rë Canaán ne, tacun ngu ciuda xi hmi rë Gabaón. Hane xuta tsëhë ciuda jan ne, jemu tsacjun me xuta tjë rë Israel tsëhë xi camachaya rë me hacutjin xi jemu cavisecoo Nina xuta xi cuacun vë. Jemu cjín ciuda catsicanga me xuta hane catsiquehen me xuta xi caviyuju sa ngajan. Hane tsëhë xi miji rë xuta nandya Gabaón xi hacuanitjin ni cuatju me cumá ne, quiji cavindacha me xuta tjë rë Israel. Titjun ni cavajá me tsjian rë me xi

jemu changá camaha ni hacuaha cafaha me niñu taja cojo niñu xutsë sehe quiji cavisiajmi me cojo xuta tjë rë Israel. Cachja me xi jemu xuta nduvacjin camaha ni me, hane cafehya me favor cojo Josué xi sahmi me ngu compromisu cojo rë me, cojo yëjë xuta xi ladu rë me. Hya xi camá ne, xuta tjë rë Israel jan ne, ha ndastu hitsë casuaainndyaain me yojo rë me xi cuinenguisse rë me Nina hacutjin sahmi me cojo cjuacjintacun xi casatë rë me hora vëhë, hane casahmi me ngu compromisu cojo xuta nandya Gabaón, casua me cjua rë me xi tsiquiin me xuta xi cuacun jan. Hisca xi cafë jyan nixtin hinchataha me ngajan ne, sehe camachaya rë me xi xuta xi cuacun jan ne, xuta Canaán má me, peru hya ne, ha casua me cjua rë me xi tsiquiin me xuta jan. Hane ngatsë rë cjuatacun vëhë, vëhë xi camajin catsiquehen me xuta xi cuacun jan. Peru xi cavetsihin nixtin hya cojo nixtin xi quiji niji sa ne, casahmi me xuta xi cuacun jan sacuaha mosu hndixahan rë me. Hane xuta xi cuacun jan ne, tu cuatjo ni quiji caviñaja me chaquin, hacuaha quiji caviñaja me nandá rë xuta tjë rë Israel.




**Jemu cjin nandya hacuaha jemu cjin ciuda xi cacaa rë  
xuta tjë rë Israel casahmi me si cojo rë me**

(Josué 10-12)

Hya xi camá ne, xuta xi matitjun camaha ni tsëhë nandya Jerusalén ne, camachaya rë me xi xuta tsëhë ciuda Gabaón ne, casahmi me ngu compromisu cojo xuta tjë rë Israel. Hane xcusun vëhë ne, cachuyiin camaha ni rë me. Cuatjin camá xi casahmitangun me ñuju sa me xi matitjun tsëhë jingu sa ciuda xi matangun cojo me ne, sehe casahmi tangun me yëjë sindadu rë me.

Sehe quiji cafaha xicjin me cojo yějě xuta nandya Gabaón. Ngajan xi xuta nandya Gabaón jan ne, cafehya me favor cojo xuta tjě rě Israel xi cuisecoo rě me, tsěhě xi tjin rě me compromisu cojo rě me xi cuacun vėhě. Ngajan xi Nina ne, cachja me cojo Josué xi cuisecoo me xuta xi cuacun jan cojo sa xi scaa rě me cojo si jan. Cuatjin camá xi Josué ne, casahmi tangun me yějě sindadu rě me sehe quiji casahmi me si vėhě. Hane tsěhě xi Nina cavisecoo rě xuta tjě rě Israel ne, caca rě me catsiquehen me yějě sindadu rě yějě me xi hñú xi matitjun jan. Hacuaha catsicanga me yějě sa cha xi cavangui jan. Hane xi quijtjengui sa sindadu rě xuta tjě rě Israel sindadu xi cavanga jan ne, jemu cjín sa cha xi catsiquehen me cha. Nina ne, cavisecoo rě me sindadu rě xuta tjě rě Israel jan ta, casahmi me xi jemu yehe camaha ni ndyojo cavixu nixtin hya. Hane hitsě sa cjín sa sindadu rě me xi hñú xi matitjun jan cahme cha ngatsě rě ndyojo xi cavixu jan xi cuma rě xi catsiquehen sindadu rě Israel. Hacuaha tjin ngu sa xcusun xi casahmi Nina ngatsě rě sindadu rě xuta tjě rě Israel nixtin hya. Josué ne, cafehya rě me Nina xi cumanduju sa hora rě nixtin vė cojo sa xi cjuenduju sa si xi sahmi sindadu rě me. Ngajan xi Nina ne, casahmi me xi tsuhi ne, casetahahñu nixtin hya. Cuatjin camá xi jercu quijicani rě ngu



nixtin vëhë. Hya xi ha quihndë cacaain rë sindadu condra rë sindadu rë xuta tjë rë Israel ne, ngajan xi sindadu rë xuta tjë rë Israel jan ne, quiji me ciuda rë xuta xi hñú xi matitjun jan, hacuaha quiji me ngujo sa ciuda cojo ngujo sa nandya, hane cacaa rë me cojo si xi casahmi me cojo xuta xi cuacun jan yëjë ni cahndë. Hacuaha catsiquehen me yëjë xuta xi siu nandya cojo me xi siu ngajan ciuda jan, hacuaha catsihñu me me xi matitjun jan catsiquehen me me.

Hya xi camá ne, me xi matitjun tséhë ngu ciuda xi hmi rë Hasor ne, xi camachaya rë me xcusun xi camá jan ne, jemu cjin me xi matitjun casahmi tangun me me. Yëjë ni me xi cuacun jan ne, casahmi tangun me sindadu rë me cojo naxin cojo carreta xi ha tuxa tséhë si, sehe quiji cafaha xicjin me cojo xuta tjë rë Israel. Ngajan xi Nina ne, cachja me cojo Josué xi hacuiin tsacjun me cuma tséhë xuta xi cuacun jan, ta xuta tjë rë Israel ne, xi cuma nchujun jan ne, hatuxa scaa rë me cojo xuta xi cuacun jan. Cuatjin camá xi Josué ne, quiji cojo me sindadu rë me hane ha tu ña hñu cavetsihin cafaha xicjin me cojo condra rë me; cacaa rë me cojo yëjë xuta xi cuacun jan. Hisca catsiquehen me me, cavaca me carreta rë xuta jan, carreta xi hatuxa tséhë si, hacuaha cavatë me naxahñu tyjuhmi rë chu naxin rë xuta jan. Hane sehe quiji Josué cojo sindadu rë me quijitjengui me Hasor hacuaha cacaa nga ni rë me cojo xuta jan; catsiquehen me yëjë xuta jan sehe cavetaha rë me ndihi ciuda. Hya xi camá ne, quiji sa me ngujo nandya cojo ngujo ciuda catsinguetsun me, hacuaha cafë xuta rë catsiquehen me. Peru chu xi siu ngajan ne, cafaha me chu hacuaha cafaha me xcusun xi casacu rë me ngajan. Cuatjin camá hya xi Josué cojo sindadu rë xuta tjë rë Israel cacaa rë me



cafhataha me nangui ladu v h , hya xi jemu cjin camaha ni ciuda catsicj ya me.

## **Cavat cja Josu  nangui ngajni tejo ndihya xuta**

### **tj  r  Israel**

(Josu  13-22)


Jemu jy  nixtin cavindeya r  catsujyihya Josu  cojo xuta tj  r  Israel sehe cama cafhataha me nangui ladu r  Cana n. Hane xi cuatjin jy  nixtin ne, Josu  ne, hacuaha cam  changa me. Ngajan xi Nina ne, cachja me cojo Josu  xi handasa cj   cuijnetaha cjuahataha me y j  nangui ladu r  Cana n, peru meje r  xi cuat cja me nangui jan ngajni r   naja ndihya vasen xuta xi cj   cjuahatsja me nangui. Eleasar, me xi matitjun ts h  nahmi, cojo me xi matitjun ts h  jima ngu ndihya xuta tj  r  Israel ne, me v h  cavisecoo me Josu  xi cuat cja me nangui. Hane xi cavetsihin cavat cja me nangui ne, suerte cavax  me ts h  jima ngu xuta xi cuma tsejen jar  nangui xi sat  r  me.

Caleb, ngu me tsëhë xi tejo xihin xi quiji cavutsejensun titjun jan ne, tacun cuaha me. Hane tsëhë xi Caleb cachja me cojo xuta tjë rë Israel ngatsë rë xi hacuiin cuma chuvacacun me xi cjue sahmi me si cojo xuta Canáan ne, vëhë xi nima Moisés ne casua me cjua rë me xi Caleb ne, cjuaha me nangui hiscan xi casatë rë me quiji cavutsejensun me. Cuatjin camá xi Caleb ne, cafehya me cojo Josué xi sua me nangui vëhë xi cumá tsëhë Caleb. Hya xi camá ne, Josué ne, cachuya rë cjua jan hane casua me Caleb nandya Hebrón. Hya xi camá ne, quiji Caleb casahmi me si cojo xuta tsëhë ciuda vëhë hane cafhataha me nangui vëhë. Caleb ne, hacuaha cojo me má me xuta ladu rë Judá, hane nangui rë me ne, hacui nangui xi casatë rë ngu ndihya xuta xi hacuaha ladu rë Judá. Nangui vëhë ne, quitaha taha ladu sur tsëhë Canaán. Ngajan cahntsua nangui vëhë ne, ngajan tacun nandya Jerusalén. Peru xuta ladu rë Judá xi casatë rë me nandya jan me, camajin cavaxë me xuta jebuseo xi siu ngajan, vëhë xi tjin rë me xi cuiyuju tangun me cojo xuta jan.

Hane ladu ngatihin tsëhë Canaán ne, casatë rë ngu ndihya xuta ladu rë Efraín cojo ngu ndihya xuta ladu rë Manasés xi cjëë sacu rë me nangui. Ngajan xi xuta xi cuacun vë ne, xi má rë me ne, xtetaain

nangui xi cuatjin jyihí xi cuma tséhë me. Ngajan xi Josué ne, cachja me cojo rë me ta cuma cjuaha sa me ndetjun hiscan siu sa xuta sá xi cuma cuaxëxin me xuta xi cuacun jan.

Hane xuta tjë rë Israel ne, catsindaja me yungun tsjian ngajan hiscan cavejña ciuda Silo, hacuaha caviyuju me cjuatacun rë me xi cuatëcja me nangui vëhë ngajñi rë yatu ndihya sa xuta ta vëhë ngu rqui sa nangui xi vangui tséhë nangui ladu rë Canaán. Ngajan xi catsingatju me ngujo xihin quiji cavatëcja cha nangui vëhë. Yatu cahndë casahmi cha yëjë nangui xi cavangui tséhë ladu vëhë.



Hane xi cavetsihin cavatëcja me ne, cavaxë nga me suerte ngajñi rë xi yatu ndihya sa xuta jan. Jo ndihya xuta ladu rë Simeón cojo Benjamín ne, cafahtsja me nangui tiña nangui xi casatë rë ngu ndihya xuta ladu rë Judá, hane xuta ladu rë Zabulón, Isacar, Aser, Neftalí cojo cha Dan ne, cafahtsja me nangui xi siutaha hitsë sa tiña ladu ngatihin. Hya xi camá ne, sehe casua rë me nahmi cojo xuta levita yachan jyin ciuda, tsëhë xi me xi cuacun vë ne, casacuiin rë me nangui tsëhë cahndë vëhë. Hane ngajñi rë ciuda xi cuacun vëhë ne, cavaxijin me jyin ciuda, cahndë xi cuma sacuaaha ciuda xi cuma cuiyujhma xuta, cojo sa xi ngu xihin xi catsiquehen cha jingu sa xihin peru hacuiin hatuxa meje tsiquehen cha ne, cuma cjue cuangahma cha ngajan xi cuetjutje cha tsëhë xuta rë nima xi catsiquehen cha jan.

Hane xi cafë cavatëcja me nangui yëjë ni ladu vëhë ne, sehe cachja Josué cojo yëjë cha ladu rë Rubén cojo cha Gad, cojo vasen cha ladu rë Manasés xi tsëhë xi ha casahmichihin cha compromisu rë cha xi cavisecoo cha yëjë sa xuta tjë rë Israel xi cjuaha xicjin me cojo yëjë xuta Canaán, quihndë cuma cuya cjue cha nangui rë cha taha ladu vetjucaa tsuhi tsëhë ndajyë Jordán. Sehe Josué ne,

catsinguitsjen rë me yějë xuta xi cuacun jan xi meje rë xi cuihndë me sacuatjin chja ley rë Nina, hacuaha catitsihmucacun me Nina cojo yějë xahasen rë me.

## **Cachja Josué conseju xi cajnetaha xi cachja me cojo xuta tjë rë Israel**

(Josué 23-24)

Hya xi ha jemu changá camá Josué ne, cajindaya me xuta xi vitexa ngajñi rë xuta tjë rë Israel sehe cachja me cojo xuta jan conseju xi cajnetaha. Cuitjin cachja me:

—Ngayun ne, ha cahyun hacutjin jemu ndaja cavisecoo nuju Nina xi jemu ndajyihi nangui sacu nuju xi cuinechuncahdun. Quihndë ne, ndaja chjuhuncuendun ta meje rë xi cuinuhyun tsëhë cjua rë yějë ley xi casua naja nima Moisés. Cuinuhyun cjua xi chja xi canihñutanguun cojo xuta cananeo xi siucuaha sa me nguehe ngajan cahndë vëhë. Hane hisca xi ngu xuta xi cuacun vë ne, cumajin cuixun cojo rë me. Hacuaha cachjuhunrcuun nina ndacha rë me. Ta sa xi nihñu xcusun xi chojyihi vë ne, ha quihndë cuisecuaain

nuju Nina hya xi meje naxunxun xuta xi cuacun vë, ta cahndë rë vëhë ne, sua me cahndë xi cuiyuju xuta xi cuacun vë ngajñi nuju. Sehe sahmi xuta xi cuacun vë xi nismutacun cjuatacun xi casua nuju Nina. Nacuechji rë Nina ta ha jemu ndaja tivatjun tijima, peru sá xi nihñacheen compromisu xi canihña cojo Nina, hane sá xi cahndë rë vëhë ne, tu cuetseen chjahanrcun nina ndacha, ngatsë rë vëhë ne, Nina ne, cumacjan rë me. Hane xi cumacjan rë me ne, cjuahataha me nangui naja ladu xi casua naja me. —Cuatjin cachja Josué.

Josué ne, catsinguitsjen rë me xuta jan tsëhë cjuandaja xi casahmi Nina cojo rë me ngatsë rë xutachanga rë me. Cjuandaja vë cavetsihin hisca hya xi tacun Abraham hisca cjuenduju sa. Hacuaha catsinguitsjen rë me yëjë ni xcusun xi casahmi Nina cojo rë suva me. Hacuaha hisca cafehya me favor xuta jan xi cjuaharcuaain me hisca xi ngu nina ndacha, ta xi meje rë ne, ngu ni Nina xi cjua quixi ne, me vëhë ni xi cjuaharcun me. Hya xi camá ne, sehe catsingatju Josué xuta jan jima ngu me xcun nangui xi casatë rë me. Hacuaha catsindeya me ñihi rë nangui jan ta, ha quihndë xuta tjë rë Israel satë rë me nangui cahndë rë xi xuta cananeo satë rë me nangui. Vëhë xi hacuiin Canaán cachja me tsëhë nangui ta, Israel cachja me tsëhë.

Hane jemu chuva nixtin jan ne, cahme Josué sehe caveyaniji me xcun ngu rqui nangui tsëhë ciuda xi ha casatë rë nima. Nangui vëhë ne, quitaha ngajan nangui Israel hiscan xi casatë rë xuta tjë rë Efraín, tsëhë xi hacuaha xuta ladu vëhë má nima. Nixtin xi Josué cavejña me cjuahñu ne, yëjë xuta tjë rë Israel ne, cafaharcun me Nina xi cjuaquixi. Hacuanitjin ni quijinduju sa cafaharcun me Nina hya xi siucuaha sa xutachanga rë me xi cavëë cjuarcun xi casahmi Nina hya xi casua me nangui ladu vëhë. Hacuaha nixtin hya ne, cavinchaniji xuta tjë rë Israel ninda rë nima José xi canduvacojo me ngajan Egipto. Cavinchaniji me ninda jan ngajan nangui Israel hiscan xi casatë rë quihndindaicjin rë nima.











